

Na osnovu Zakona br. 003/L-073 o opštim izborima, Zakona br. 003/L-256 o izmjenama i dopunama Zakona o opštim izborima, Zakona br. 03/L-074 o finansiranju političkih subjekata Republike Kosovo i Pravila br. 01/2013 o registraciji i radu političkih partija, Skupština NAŠA Inicijativa dana \_\_\_\_\_ 2020. godine donosi:

# **STATUT**

## **NAŠA Inicijativa**

### **I DIO**

#### **Osnovne Odredbe**

#### **Član 1**

##### **Predmet Statuta**

Ovim Statutom politički subjekt “NAŠA Inicijativa”, u skladu sa Ustavom Republike Kosova (u daljem tekstu RKS) uređuje sve bitne odnose koji su od značaja za političko djelovanje, uređuje se način njegovog osnivanja i djelovanja na teritoriji RKS. Utvrđuje se njegov naziv i sjedište, simboli njegovog identiteta, izgled i sadržina pečata te programski ciljevi, način učlanjenja, prava, obaveze i odgovornosti članova, prestanak članstva, unutrašnja organizacija, njihov sastav, način izbora i opoziva, trajanje mandata i način odlučivanja. Također se uređuje i zastupanje političkog subjekta ‘NAŠA Inicijativa’, postupak za izmjene i dopune programa i Statuta i postupak donošenja i izmjene drugih opštih akata, ostvarivanja javnosti rada, način finansiranja, određivanje lica odgovornog za finansijsko

poslovanje i podnošenje izveštaja, lica ovlašćenog da kontaktira sa nadležnim organima, komunikaciju sa javnošću, način donošenja odluke o prestanku rada, kao i druga pitanja od značaja za rad i djelovanje političkog subjekta u skladu sa Zakonima i pravilnicima.

Izrazi koji se u ovom Statutu koriste za fizička lica u muškom rodu, podrazumijevaju iste izraze u ženskom rodu, u skladu sa načelom rodne ravnopravnosti.

## **Član 2**

### **Pravni Status**

NAŠA Inicijativa ima status pravnog lica.

NAŠA Inicijativa je politički subjekt Bošnjaka Kosova kao nevećinske zajednice u RKS.

## **Član 3**

### **Naziv**

Pun naziv političkog subjekta je: 'NAŠA Inicijativa' (u daljem tekstu će se, uz pun naziv 'NAŠA Inicijativa' u istom kontekstu koristiti i odrednica 'politički subjekt').

Skraćeni naziv – akronim je: NAŠA. U političkom djelovanju i pravnom prometu uz puni naziv koristi se i skraćeni naziv - NAŠA.

## **Član 4**

### **Zastupanje**

Politički subjekt zastupa Predsjednik, on može ovlastiti i druga lica da zastupaju i predstavljaju politički subjekt u skladu sa ovim Statutom.

## **Član 5**

### **Sjedište**

Sjedište političkog subjekta je u selu Rečane, u ulici Vodenička-Rečane, Prizren.

NAŠA Inicijativa djeluje na području RKS.

## **Član 6**

### **Obilježja**

Obilježja političkog subjekta čine zastava i amblem.

Zastava političkog subjekta je pravougaonog oblika bijele boje. U središnjem dijelu zastave je amblem pokreta, ljiljani, mjesec i kosovska karta.

Amblem političkog subjekta je pravougaonog oblika, unutrašnji dio obojen je teget bojom, u sredini sa latiničnim natpisom bijele boje 'NAŠA', u donjem dijelu desnog ugla latinični natpis bijele boje 'Inicijativa'.

## **Član 7**

### **Pečat**

NAŠA Inicijativa ima svoj pečat, on je okruglog oblika u gornjem dijelu u polukružnom obliku ispisan je tekстом 'NAŠA Inicijativa'. Na dnu pečata je upisano sjedište političkog subjekta 'Rečane' dok se u središnjem dijelu nalazi akronom političkog subjekta 'NAŠA'.

Pečat i obilježja su ispisani na bosanskom jeziku.

Pečat organizacionih jedinica po teritorijalnom principu sadrži naziv političkog subjekta 'NAŠA' i naziv i mjesto organizacionih jedinica po teritorijalnom principu.

Korišćenje i čuvanje pečata utvrđuje se posebnom odlukom Glavnog odbora političkog subjekta 'NAŠA Inicijativa'.

## **Član 8**

### **Načelo Javnosti**

Rad i djelovanje političkog subjekta su javni. Javnost rada i djelovanje članstva, organa i političkog subjekta u cjelini ostvaruje se na javnim skupovima, tribinama, učešćem na okruglim stolovima i na druge načine.

Javno djelovanje političkog subjekta omogućuje se sjednicama i sastancima organa političkog subjekta otvorenim za javnost, konferencijama za medije, izjavama i saopštenjima za javnost.

Javnost rada političkog subjekta obezbjeđuje se i putem prezentacije na internet stranici političkog subjekta, kao i putem prezentacija na društvenim mrežama.

Organi političkog subjekta mogu raspravljati i odlučivati o unutrašnjim pitanjima, bez prisustva javnosti.

## **Član 9**

### **Nacionalna Jednakost**

NAŠA Inicijativa zastupa interese Bošnjaka, unapređenju i očuvanju njihovog identiteta. Ona njeguje njihovu vlastitu kulturu kroz državne i druge institucije i organizacije, informisanje na maternjem jeziku.

NAŠA Inicijativa se zalaže za pravedno društvo u državi svih naroda, zajednica i građana koji žive na prostoru RKS.

## Član 10

### Načelo rodne ravnopravnosti

NAŠA Inicijativa će promovirati jednaka prava za sve žene, te podržava njihovu punu participaciju u svim strukturama političkog subjekta.

NAŠA Inicijativa će promovirati rodnu ravnopravnost, kroz omogućavanje učešća žena u procesu odlučivanja, kao i podstrekivanja žena za aktivan rad u svim organima političkog subjekta.

NAŠA Inicijativa će omogućiti da žene čine minimalno 30% (trideset procenata) u strukturama političkog subjekta, a sve u skladu sa principima rodne ravnopravnosti i zakonskih osnova RKS.

## Član 11

### Ciljevi

NAŠA Inicijativa je politička organizacija slobodnih, odgovornih i samostalnih članova koja svoje djelovanje zasniva na principima građanske države i društva. NAŠA Inicijativa se zalaže za ostvarenje sljedećih ciljeva:

- Da je svaki čovjek slobodan i jednak pred zakonom.
- Da su sloboda govora i slobodno izražavanje misli, kao i pravo života i imovine nepovrediva ljudska prava.
- Vladavinu prava i pravedne države, zaštite individualnih i kolektivnih prava građana, nezavisno od njihovog političkog uvjerenja, vjerske i nacionalne pripadnosti, pola i socijalnog statusa.
- Zaštita životne sredine i promovisanje zelene ekonomije.
- Prava na obrazovanje, zdravstvenu i socijalnu zaštitu, porodična, radna i druga prava.
- Borba za preporod etničkog, kulturnog, jezičkog, vjerskog i svakog drugog svojstva bošnjačke zajednice.

- Sveukupna afirmacija bošnjačke zajednice i poimanje njenog statusa kao realiteta u strukturi multietničkog sastava Kosova, što može dati doprinos demokratičnosti društva i bogatstvu suživota.

U skladu sa potrebama, NAŠA Incijativa će svoje ciljeve ostvarivati i preko svojih organizacionih jedinica koje se organizuju na mjesnom i opštinskom nivou.

Mjesnom organizacionom jedinicom rukovodi Odbor organizacione jedinice koji se sastoji od predsjednika, blagajnika i tri člana.

Svaka opštinska organizaciona jedinica ima Odbor koji se sastoji od predsjednika, potpredsjednika, sekretara, blagajnika i tri člana koji se po podružnicama biraju od strane članova podružnice.

## **II DIO**

### **Članstvo**

#### **Član 12**

##### **Član političkog subjekta**

Član političkog subjekta može biti svaki punoljetan državljanin RKS koji ima pravo glasa i koji je dobrovoljno potpisao pristupnicu i prihvata Program i Statut istog. NAŠA Incijativa vodi registar svojih članova.

Izuzetno, Predsjedništvo političkog subjekta u cilju zaštite ugleda političkog subjekta može donijeti odluku o odbijanju prijema u članstvo. Ova odluka mora biti obrazložena i dostavljena u roku od sedam (7) dana od dana kada je lice čiji se prijem u članstvo odbija iznijelo volju za prijem.

Na tu odluku isto lice može podnijeti prigovor Statutarnoj komisiji, rok za podnošenje ovog prigovora je petnaest (15) dana od dana prijema odluke o odbijanju. Statutarna komisija je dužna da u roku od petnaest (15) dana od dana prijema prigovora donese konačnu odluku.

Članstvo se stiče kada u roku od petnaest (15) dana Glavni odbor da saglasnost na pristupnicu koju svojeručno potpisuje lice koje traži učlanjenje. Ukoliko Glavni odbor ne odluči u roku od petnaest (15) dana, smatra se daje prećutno data saglasnost za učlanjenje.

Svi članovi političkog subjekta su ravnopravni, bez obzira na polnu, rasnu, vjersku, ili bilo koju drugu pripadnost.

Članu političkog subjekta nakon upisa u registar izdaje se članska karta, čiji izgled i sadržinu utvrđuje Predsjedništvo.

NAŠA Inicijativa može imati i počasne članove koje bira Glavni odbor na prijedlog Predsjedništva.

## **Član 13**

### **Prava članova**

Član ima pravo da:

- Bira i bude biran u sve organe političkog subjekta, u skladu sa Statutom, po uručivanju članske karte. Ravnopravno učestvuje u aktivnostima političkog subjekta.
- Slobodno izražava i zastupa svoje mišljenje.
- Daje prijedloge i podnosi inicijative u skladu sa Statutom i Programom.
- Bude informisan o planiranim aktivnostima i odlukama organa političkog subjekta.
- Dobija zaštitu ukoliko bude ugrožen zbog obavljanja političkih aktivnosti.
- Zahtjeva tumačenje Statuta i drugih akata.
- Ostvaruje i druga prava predviđena Statutom i drugim pravnim aktima političkog subjekta.

## **Član 14**

### **Obaveze članova**

Član političkog subjekta je dužan da :

- zastupa politiku političkog subjekta u skladu sa Statutom i programskim načelima,
- radi na očuvanju njenog ugleda,
- poštuje Statut i odluke njegovih organa,
- omasovljava članstvo političkog subjekta,
- se tokom izbora zalaže za uspjeh političkog subjekta na istim,
- ispunjava i ostale obaveze u skladu sa ovim Statutom.

## **Član 15**

### **Prestanak članstva**

Članstvo prestaje:

- svojevolumnim istupanjem (pismeno ili usmeno),
- političkim angažmanom u drugom političkom subjektu,
- gubitkom poslovne sposobnosti,
- isključenjem po odluci disciplinske komisije na žalbu organa i članova političkog subjekta,
- smrću člana.

## **Član 16**

### **Disciplinska odgovornost**

Član podleže disciplinskoj odgovornosti ako:



- politički djeluje suprotno Statutu, Programu i političkom djelovanju političkog subjekta
- ne izvršava odluke za koje je zadužen
- neovlašćeno iznosi u javnost rasprave, zaključke i pismene materijale sa sjednica organa političkog subjekta.

Odgovornost može biti politička i disciplinska.

Izrečene disciplinske mjere mogu biti:

- pismena opomena i
- isključenje iz političkog subjekta.

Odluka o utvrđenoj odgovornosti dostavlja se članu u pismenoj formi uz obrazloženje.

Disciplinski postupak je hitan i izvodi se po Pravilniku o disciplinskoj odgovornosti.

Način sprovođenja i mjere koje se mogu izreći u disciplinskom postupku bliže uređuje Pravilnik o disciplinskoj i političkoj odgovornosti, koji usvaja Glavni odbor na prijedlog Predsjedništva.

## **Član 17**

### **Prava članova u manjini**

Članovi političkog subjekta koji se ne slažu sa odlukom većine, imaju pravo da svoje mišljenje i dalje zastupaju i brane u okviru organa političkog subjekta.

Član ne može biti pozvan na odgovornost zbog iznijetog mišljenja ili glasanja u okviru organa političkog subjekta.

Ukoliko član bude ugrožen, on ima pravo na zaštitu od viših organa ili pismenim zahtjevom od Nadzornog odbora.

Ukoliko članu bude nanijeta šteta od strane nekog organa, on ima pravo tražiti nadoknadu pismenim zahtjevom od disciplinske komisije.

## **Član 18**

### **Počasni član**

Status počasnog člana političkog subjekta može biti dodjeljen pojedincu zbog izuzetnog doprinosa u radu iste.

Na obrazloženi prijedlog Predsjedništva, odluku o dodjeli statusa počasnog člana donosi Glavni odbor.

## **Član 19**

### **Članarina**

Svaki član može plaćati godišnju članarinu, u iznosu ne manjem od dvanaest (12) eura na godišnjem nivou, o čemu se vodi posebna evidencija.

Član može davati materijalnu podršku u vidu donacija i priloga, a shodno zakonskim regulativama.

## **III DIO**

### **Organizacija**

## **Član 20**

### **Osnovi organizacije**

NAŠA Inicijativa je organizovana po teritorijalnom principu, i čine ga mjesne, opštinske, regionalne i centralne organizacije.

## **Član 21**

### **Organi**

Centralni organi i tijela su :

- Skupština
- Glavni odbor
- Predsjednik
- Potpredsjednici
- Predsjedništvo
- Generalni sekretar
- Izvršni odbor
- Politički savjet
- Finansijski direktor
- Statutarna komisija
- Disciplinska komisija
- Portparol
- Nadzorni odbor
- Forum žena
- Ostali organi i odbori

Pored organa iz prethodnog stava, a u cilju uspješnijeg funkcionisanja i političkog djelovanja, konstituišu se i druga operativna tijela, odbori, savjeti i komisije na stručnim osnovama.

Rad organa je javan. Izuzetno, organ može u radu isključiti javnost.

## **Član 22**

### **Skupština**

Skupština je najviši organ odlučivanja.

Skupština može biti redovna i vanredna.

Redovna skupština je ujedno i izborna, saziva se i održava jednom u četiri godine. Na prijedlog Predsjedništva, Glavni odbor donosi odluku o sazivanju Skupštine. Odlukom se utvrđuje broj delegata i prijedlog dnevnog reda, datum i mjesto održavanja Skupštine, a objavljuje se najmanje trideset (30) dana prije dana održavanja.

Vanredna skupština se može sazvati na prijedlog Predsjednika ili na zahtjev većine članova Glavnog odbora, koja se mora održati u roku od 30 dana.

## **Član 23**

### **Nadležnost**

Skupština ima nadležnosti da:

- Usvaja Program i Statut i izmjene i dopune istih
- Donosi odluke, deklaracije i preporuke
- Bira i razrješava Glavni odbor, Predsjednika i Potpredsjednike političkog subjekta.
- Odlučuje o prestanku rada političkog subjekta.
- Donosi Poslovnik o radu Skupštine.
- Bira i razrješava predsjednika Statutarne komisije.
- Bira i razrješava Sekretara.
- Razmatra ostala pitanja vezana za politički subjekat u skladu sa Poslovnikom.

## **Član 24**

### **Sastav**

Skupštinu čine i imaju prava glasa :

- Predsjednik, Potpredsjednici i članovi Predsjedništva.
- Članovi Glavnog odbora.

- Članovi Izvršnog odbora.
- Članovi Disciplinske komisije, Nadzornog odbora, Statutarne komisije.
- Finansijski Direktor.
- Članovi Predsjedništva odbora dijaspore, mladih i Foruma žena.
- Portparol
- Predstavnici mjesnog ogranka (svaki mjesni ogranak bira od pet (5) do petnaest (15) delegata među članovima mjesnog ogranka).
- Svi nosioci visokih funkcija na centralnom i lokalnom nivou.
- Na prijedlog Predsjedništva, ostali delegati i članovi za čije učestvovanje odlučuje Glavni odbor.

## **Član 25**

### **Rad Skupštine**

Skupština punopravno odlučuje ako je prisutno najmanje dve trećine od ukupnog broja članova skupštine.

Skupština odluku usvaja većinom glasova prisutnih.

Odluke o izboru organa Skupština donosi javnim ili tajnim glasanjem.

## **Član 26**

### **Glavni odbor**

Glavni odbor je najviši organ odlučivanja između Skupštine.

Mandat članova Glavnog odbora traje četiri (4) godine.

Glavni odbor se sastaje najmanje dva (2) puta godišnje.

# Član 27

## Nadležnost

Nadležnosti Glavnog odbora su da :

- Predlaže Skupštini Program i Statut i izmjene i dopune istih.
- Predlaže Poslovnik o radu Skupštine.
- Donosi Akt o prijemu i prestanku članstva.
- U vanrednim prilikama donosi akte statutarnog važenja kojima se utvrđuje organizacija i djelatnost političkog subjekta do prestanka vanrednih prilika.
- Utvrđuje politiku upravljanja imovinom.
- Razmatra i utvrđuje finansijsku politiku i usvaja finansijske izvještaje.
- Brine o informisanju unutar političkog subjekta.
- Odlučuje o učešću političkog subjekta na izborima na svim nivoima.
- Usvaja izborne liste za učešće na izborima.
- Odlučuje o stupanju i istupanju u/iz koalicija.
- Odlučuje o učešću u izvršnim organima vlasti na svim nivoima i istupanju iz istih.
- Bira i razrješava Disciplinsku komisiju na prijedlog Predsjednika.
- Donosi Pravilnik o disciplinskoj odgovornosti.
- Dvotrećinskom većinom glasova raspisuje vanredne izbore ili izbore u određenom organu političkog subjekta.
- Razmatra i usvaja izvještaj Predsjednika o svom radu i radu Predsjedništva.
- Može pokrenuti postupak za izglasavanje nepovjerenja Predsjedniku i ostalim članovima Predsjedništva.
- Razmatra i usvaja godišnji izvještaj Nadzornog odbora, Disciplinske komisije i ostalih organa.
- Razmatra prijedlog Političkog savjeta o strategiji djelovanja političkog subjekta.
- Kooptira nove članove Glavnog odbora na prijedlog članova Glavnog odbora.
- Obrazuje stalne ili povremene komisije sa određenim zaduženjima.
- Potvrđuje odluke nižih organa ukoliko je potrebno.

- Raspravlja i odlučuje o svim bitnim pitanjima za rad političkog subjekta.

Glavni odbor može da odlučuje i o pitanjima iz nadležnosti Skupštine, s tim što je obavezan da donesene odluke podnese Skupštini radi odobrenja.

## Član 28

### Sastav Glavnog odbora

Glavni odbor čine 13 izabраниh članova. Pored izabраниh članova u sastav Glavnog odbora ulaze i članovi po funkciji i to:

- Predsjednik
- Potpredsjednici
- Predsjednik Izvršnog odbora (IO)
- Predsjednik političkog savjeta
- Portparol
- Predsjednik odbora za dijasporu
- Predsjednik omladine
- Predsjednik Statutarne komisije
- Predsjednik Foruma žena

Svi članovi koji su nosioci određenih javnih funkcija u organima vlasti na svim nivoima, učestvuju u radu Glavnog odbora.

Predsjednika i potpredsjednike Glavnog odbora bira Glavni odbor na prijedlog Predsjedništva.

Izborne članove Glavnog odbora bira Skupština sa odvojenih lista koje podnose mjesni ogranci i sa liste Omladine i Foruma žena.

Prilikom izbora članova Glavnog odbora, na listi mora biti više kandidata od broja koji se bira.

Glavni odbor može između dvije Skupštine vršiti izmjene u svom sastavu kooptiranjem članova Glavnog odbora, koji se vrši na prijedlog Predsjedništva. Izmjene se mogu vršiti najviše do jedne trećine članova.

## **Član 29**

### **Rad glavnog odbora**

Predsjednik Glavnog odbora bira se na prvoj konstituivnoj sjednici Glavnog odbora koja se održava najkasnije u roku od tri (3) dana od dana izbora.

Sjednice Glavnog odbora saziva predsjednik Glavnog odbora najmanje sedam (7) dana prije njenog održavanja, izuzetno u slučajevima hitnosti sjednice se mogu sazivati u roku kraćem od sedam (7) dana.

Predsjednik Glavnog odbora je u obavezi da na zahtjev jedne trećine članova Glavnog odbora sazove sjednicu Glavnog odbora u roku od trideset (30) dana od dana prijema zahtjeva.

Glavni odbor može punopravno odlučivati ako sjednici prisustvuje većina članova Glavnog odbora

Odluka se smatra usvojenom ukoliko za nju bude glasala većina prisutnih članova, osim ukoliko nije Pravilnikom drugačije predviđeno.

Sjednicom Glavnog odbora predsjedava predsjednik Glavnog odbora.

U slučaju istog broja glasova, glas predsjedavajućeg Glavnim odborom je presudan.

Glavni odbor glasa javno, ali može većinom glasova odlučiti da glasa i tajno.

Ukoliko član Glavnog odbora ne dođe na sjednicu neopravdano tri puta uzastopno, Glavni odbor predlaže Disciplinskoj komisiji isključenje člana iz Glavnog odbora.



## **Član 30**

### **Izvršni odbor**

Izvršni odbor političkog subjekta je izvršno i operativno tijelo Glavnog odbora. Izvršni odbor čine članovi u broju koji Glavnom odboru predloži kandidat za Predsjednika Izvršnog odbora političkog subjekta. U rad Izvršnog odbora mogu učestvovati i Predsjednik političkog subjekta, Potpredsjednici i Generalni sekretar .

Iako nisu članovi Izvršnog odbora, bez prava glasa, sjednici mogu prisustvovati predsjednici foruma omladine i žena, član predsjedništva dijaspore, funkcioneri na centralnom i lokalnom nivou, kao i funkcioneri koji se po određenim pitanjima iz njihove nadležnosti pozivaju na sjednicu.

Mandat Izvršnog odbora traje četiri (4) godine.

Predsjednik Izvršnog odbora jednom u tri (3) mjeseca podnosi Glavnom odboru izvještaj o radu Izvršnog odbora.

## **Član 31**

### **Izbor**

Kandidata za predsjednika Izvršnog odbora predlaže Predsjednik političkog subjekta.

Predsjednik Izvršnog odbora izabran je većinom glasova od ukupnog broja članova Glavnog odbora.

Izborom predsjednika Izvršnog odbora istovremeno su izabrani i članovi Izvršnog odbora.

## **Član 32**

### **Način glasanja.**

Izvršni odbor odlučuje na sjednici na kojoj je prisutna većina članova Izvršnog odbora. Izvršni odbor donosi odluke većinom glasova prisutnih sa pravom glasa.

## **Član 33**

### **Nadležnost**

Izvršni odbor :

- Odgovara za sprovođenje odluka Glavnog odbora.
- Usklađuje i nadzire rad lokalnih organa političkog subjekta.
- Stara se o organizacionom jačanju političkog subjekta
- Suspenduje i raspušta mjesne ogranke i ukida njihove odluke suprotne Programu i Statutu političkog subjekta.
- Priprema politički subjekt za izbore, formira izborne štabove i predlaže Predsjedništvu plan izborne kampanje
- Vršiti i druge poslove u skladu sa Statutom.

Odluku o raspuštanju Izvršnog odbora donosi Glavni odbor većinom glasova.

## **Član 34**

### **Predsjednik**

Predsjednik predstavlja, zastupa i rukovodi političkim subjektom.

Predsjednik određuje odgovornost potpredsjednicima, u saradnji sa Predsjedništvom. U slučaju duže odsutnosti, Predsjednika zamjenjuje jedan od potpredsjednika kog Predsjednik ovlasti.

Mandat Predsjednika traje četiri (4) godine. Član političkog subjekta ne može biti biran za Predsjednika više od dva (2) puna mandata.

Predsjednik je ujedno i član Predsjedništva.

U slučaju da Predsjednik bude izabran za predstavnika naroda u institucijama Kosova na centralnom nivou, njegov mandat prestaje mjesec dana nakon izbora. U istom vremenskom periodu Predsjedništvo je u obavezi da predloži novog kandidata za Predsjednika, kojeg postavlja Glavni odbor sve do održavanja redovne Skupštine, na kojoj se vrši redovan izbor organa političkog subjekta. U slučaju da u predviđenom roku Predsjedništvo ne bude predložilo novog kandidata, to će uraditi Glavni odbor.

Predsjednik ne može u isto vrijeme biti i nosilac izbornih lista za lokalne i centralne izbore.

## **Član 35**

### **Nadležnost Predsjednika**

Predsjednik:

- predstavlja i zastupa politički subjekt u skladu sa Zakonom, Statutom i Programom,
- sprovodi politiku političkog subjekta u skladu sa Programom,
- saziva i predlaže sjednice Predsjedništva, Glavnog odbora i Skupštine,
- imenuje svoje savjetnike za određene oblasti,
- stara se o izvršenju odluka Skupštine, Glavnog odbora i Predsjedništva,
- predlaže kandidate za Potpredsjednike i Generalnog sekretara,
- za svaku finansijsku transakciju, u iznosu do kojeg je Zakonom i odlukom Glavnog odbora ovlašćen, mora podnijeti izvještaj na prvoj narednoj sjednici Glavnog i Izvršnog odboru.
- imenuje Portparola,
- koordinira saradnju svih organa političkog subjekta,
- obavlja i druge poslove u skladu sa Statutom i Poslovníkom.

Predsjednik je dužan da jednom godišnje podnosi izvještaj o svom radu Glavnom odboru.

## **Član 36**

### **Kandidovnje**

Za Predsjednika se može kandidovati svaki član koga predloži najmanje pet (5) mjesnih odbora političkog subjekta ili dvadeset (20) skupštinara svojim potpisom. Kandidat za Predsjednika treba da predloži programsku platformu i listu kandidata za Potpredsjednike političkog subjekta. Glavni odbor utvrđuje listu kandidata za Predsjednika.

## **Član 37**

### **Izbor**

Skupština tajnim glasanjem bira Predsjednika.

Za Predsjednika izabran je kandidat koji u prvom krugu glasanja dobije većinu glasova od ukupnog broja skupštinara.

Ako na izboru učestvuje jedan kandidat i ne dobije potreban broj glasova, postupak kandidovanja i izbora se ponavlja. Izborom Predsjednika usvojena je i programska platforma koju je predložio.

## **Član 38**

### **Smjena Predsjednika**

Predsjednik za svoj rad odgovara Predsjedništvu, Glavnom odboru i Skupštini.

Jedna trećina Glavnog odbora ili jedna trećina članova Skupštine mogu pokrenuti pitanje nepovjerenja Predsjedniku, za šta će se izjasniti većinom glasova Glavni odbor ili Skupština.

## **Član 39**

### **Potpredsjednici**

Kandidat za Predsjednika određuje broj Potpredsjednika političkog subjekta.

Skupština bira Potpredsjednike na prijedlog Predsjednika na period od četiri (4) godine.

Potpredsjednici su zaduženi za ostvarivanje određenih djelova programa koje im delegira Predsjednik i pomažu Predsjedniku u njegovom radu.

Potpredsjednici za svoj rad odgovaraju Predsjedniku, Glavnom odboru i Skupštini.

U slučaju da mjesto Potpredsjednika bude upražnjeno iz bilo kog razloga, do izbora novog Potpredsjednika Glavni odbor može izabrati Potpredsjednika koji će obavljati poslove do prve redovne ili vanredne sjednice Skupštine.

## **Član 40**

### **Predsjedništvo**

Predsjedništvo je najviši politički organ političkog subjekta.

Predsjedništvo se sastaje najmanje jednom u tri (3) mjeseca.

## **Član 41**

### **Sastav Predsjedništva**

Predsjedništvo čine :

- predsjednik
- potpredsjednici
- sekretar, i
- portparol.

U slučaju važnih odluka, Predsjednik saziva prošireni sastav Predsjedništva.

## Član 42

### Nadležnost Predsjedništva

Predsjedništvo ima nadležnosti da:

- Vršiti kontrolu ukoliko NAŠA Inicijativa vrši vlast na lokalnom ili centralnom nivou.
- Predlaže Glavnom odboru odluke o učešću ili neučešću na izborima na svim nivoima.
- Predlaže Glavnom odboru izbornu listu za sve nivoe učešća na izborima.
- Predlaže Glavnom odboru odluku o stupanju i istupanju iz koalicije.
- Predlaže kandidate za funkcije koje bira Glavni odbor.
- Predlaže Glavnom odboru izborni program.
- Detaljno propisuje uslove za kandidate koji se predlažu na listama, kao i uslove koje treba da ispunjavaju kandidati za javne funkcije na svim nivoima.
- Analizira političku situaciju i donosi političke stavove, zaključke i odluke.
- Stara se o informisanju.
- Utvrđuje i vodi kadrovsku politiku
- Daje saglasnost na aktivnostima u dijaspori, aktivnosima mladih i Foruma žena.
- Predsjedništvo donosi Poslovnik o svom radu i jednom u tri (3) mjeseca podnosi izvještaj o radu Glavnom odboru.
- Predlaže i obavlja i druge poslove u skladu sa svojim Poslovnikom i Statutom.

## **Član 43**

### **Generalni Sekretar**

Generalni Sekretari je organ koji se stara o tehničkom sprovođenju odluka svih organa. Generalni Sekretar brine o organizaciji rada, stručnom i operativnom izvršavanju poslova i zadataka političkog subjekta.

Generalnog Sekretara predlaže Predsjednik, a bira Skupština na period od četiri (4) godine. Za svoj rad odgovara Glavnom odboru.

Generalni Sekretar rukovodi radom administracije. Potpisuje dokumenta u vezi sa radom administracije. Obavlja i druge poslove koje mu Glavni i Izvršni odbor daju u nadležnost.

Sekretar za svoj rad odgovara Glavnom odboru i Predsjedništvu.

## **Član 44**

### **Politički savjet**

Politički savjet je savjetodavni organ, za svoj rad odgovara Predsjedništvu, na prijedlog Predsjednika. Predsjedništvo bira i razrješava članove političkog savjeta.

Član Političkog savjeta može, ali ne mora biti član političkog subjekta.

Politički savjet razmatra idejna i politička pitanja koja su od važnosti za strategiju političkog subjekta.

Politički savjet zasjeda najmanje jednom u godinu dana.

Politički savjet :

- Predlaže Skupštini godišnji program.
- Daje prijedlog Predsjedništvu u kojem pravcu bi politički subjekt trebao da se kreće.
- Predlaže Predsjedniku političkog subjekta prijedlog izbornog programa.

## **Član 45**

### **Sastav**

Politički savjet čine:

- Predsjednik političkog savjeta.
- Potpredsjednik političkog savjeta.
- Predsjednik Nadzornog odbora.
- Stalni članovi političkog savjeta čiji broj određuje predsjednik Političkog savjeta.
- Sadašnji i bivši predsjednici opština/gradonačelnici, poslanici, ministri.
- Ostali članovi na prijedlog predsjednika Političkog savjeta.

## **Član 46**

### **Finansijski Direktor**

Finansijski direktor ovlašćen je za kontakte sa nadležnim organima.

Finansijski direktor odgovoran je za finansijsko poslovanje političkog subjekta, podnošenje finansijskih izvještaja i vođenje poslovnih knjiga.

## **Član 47**

### **Nadležnost**

Finansijski Direktor nadležan je da:

- Organizuje, upravlja i rukovodi radom službi koje vrše stručne, administrativne i finansijske poslove.
- Potpisuje finansijska dokumenta.
- Izvršava naloge predsjednika političkog subjekta.



## **Član 48**

### **Izbor i razrešenje**

Finansijskog Direktora bira i razrješava Predsjedništvo, većinom glasova od ukupnog broja članova Predsjedništva.

## **Član 49**

### **Statutarna komisija**

Statutarna komisija ima pet (5) članova i to: predsjednika, potpredsjednika i tri člana koje bira i razrješava Skupština na prijedlog Predsjedništva.

Komisiju saziva predsjednik Statutarne komisije koji je ujedno i predsedavajući

Mandat Statutarne komisije traje četiri (4) godine.

Odluke se donose većinom glasova.

Statutarna komisija se sastaje po potrebi, a najmanje jednom godišnje.

Tumačenje Statuta i drugih opštih akata mogu tražiti svi organi političkog subjekta.

Članovi Statutarne komisije ne mogu biti istovremeno i članovi drugog organa koje bira Skupština.

Predsjednik Statutarne komisije po službenoj dužnosti prisustvuje svakoj sjednici Glavnog odbora, Izvršnog odbora i Predsjedništva.

Odluke Statutarne komisije su obavezujuće i konačne.

## **Član 50**

### **Nadležnost**

Statutarna komisija :

- Tumači Statut i druge akte
- Odlučuje u drugom stepenu disciplinske odgovornosti
- Podnosi Izvještaj o radu Skupštini
- Predlaže pravilnik o disciplinskoj odgovornosti Glavnom odboru
- Utvrđuje nacrt i izmjene i dopune Statuta
- Odlučuje o usklađenosti odluka organa političkog subjekta sa Statutom
- Utvrđuje usklađenost pojedinih akata sa Zakonom, i stavlja van pravne snage neusaglašene akte.

## **Član 51**

### **Disiplinska komisija**

Disciplinska komisija odlučuje u prvom stepenu o odgovornosti člana političkog subjekta za postupke kojima se nanese šteta ugledu i interesima političkog subjekta.

## **Član 52**

### **Sastav i izbor**

Disciplinska komisija ima tri (3) člana koje bira i razrešava Glavni odbor.

Na prvoj konstituivnoj sjednici bira svog predsjednika.

## **Član 53**

### **Nadležnost**

Disciplinska komisija:

- rješava sukob između organa i članova političkog subjekta,
- donosi odluku o podnijetim žalbama organa i članova političkog subjekta,

- podnosi Izvještaj o svojim odlukama Glavnom odboru.

Na odluku ove Komisije član se može žaliti Statutarnoj komisiji u roku od 8 dana.

Disciplinska komisija se sastaje po potrebi, kada je porebno donijeti odluku o sankciji kada organi ili članovi političkog subjekta ne poštuju Program, Statut ili druge akte.

Na zahtjev Predsjedništva, Disciplinska komisija raspravlja i daje preporuke u vezi sa međuljudskim odnosima članova, onda kada se smatra da su oni narušeni.

## **Član 54**

### **Portparol**

Portparol je ovlašćeno lice za iznošenje informacija u javnost, predstavnicima medija i dr. Portparol je, u saradnji sa ostalim organima, zadužen i za marketing.

Mandat portparola traje četiri (4) godine.

Portparola imenuje Predsjednik političkog subjekta.

Portparol ima pravo da se u isto vrijeme kandiduje i za jedno od slobodnih mjesta Potpredsjednika političkog subjekta, kao i potpredsjednika Glavnog ili Izvršnog odbora političkog subjekta.

## **Član 55**

### **Nadzorni odbor**

Nadzorni odbor je kontrolno-nadzorni organ političkog subjekta.

Nadzorni odbor bira Glavni odbor.

Mandat Nadzornog odbora traje četiri (4) godine.

Nadzorni odbor ima pet (5) članova: Predsjednik, Zamjenik predsjednika i tri člana.

Nadzorni odbor:

- Vršiti kontrolu finansijskog poslovanja.
- Prati, analizira i u Izvještaju ocjenjuje aktivnosti članova Predsjedništva i drugih organa.
- Prati upravljanje pokretnom i nepokretnom imovinom političkog subjekta.
- Prati poštovanje rada političkog subjekta, svih pravilnika i poslovnika.
- Nadzorni odbor predlaže Disciplinskoj komisiji prijedlog sankcija.
- Saziva izbornu Skupštinu u skladu sa Statutom.

Nadzorni odbor se sastaje vanredno na inicijativu bilo kojeg člana Nadzornog odbora radi donošenja odluka iz svoje nadležnosti, ukoliko bilo koji član ustanovi da funkcioneri krše Statut ili štete radu i ugledu političkog subjekta.

Rad Nadzornog odbora se bliže uređuje Pravilnikom o Nadzornom odboru.

Ispravnost rada Nadzornog odbora nadgleda Disciplinska komisija i Disciplinska komisija može Glavnom odboru pokrenuti prijedlog smjene organa Nadzornog odbora za šta je potrebna dvotrećinska većina glasova prisutnih.

## **IV DIO**

### **Posebni Oblici Organizovanja**

#### **Član 56**

##### **Forum žena**

NAŠA Inicijativa ima Forum žena.

Forum žena predstavlja poseban organizacioni oblik.

Osnovi organizacije i djelovanja Foruma žena utvrđuju se odlukom Glavnog odbora.

Forum žena donosi Statut Foruma žena i druge akte u čiju nadležnost im bude povjerio Glavni odbor.

Forum žena, uvažavajući temeljne ciljeve političkog subjekta, zalaže se za prava žena i zaštitu tih prava, a sve u cilju poboljšanja položaja žena u društvu.

## **Član 57**

### **Forum Mladih**

NAŠA Inicijativa ima Forum mladih.

Forum mladih predstavlja poseban organizacioni oblik.

Osnovi organizacije i djelovanja Foruma mladih utvrđuju se odlukom Glavnog odbora.

Forum mladih donosi Statut Foruma mladih i druge akte u čiju nadležnost im bude povjerio Glavni odbor.

Omladina promovira programske ciljeve političkog subjekta. Omladina ima pravo pokretanja rasprave na svim nivoima organizacije o različitim pitanjima, a prije svega onima koja se odnose na položaj i prava mladih.

## **Član 58**

### **Drugi organi i tijela**

Glavni odbor može obrazovati i druga stalna ili povremena tijela.

- Odbor za dijasporu
- Forum penzionera.
- Savjet za lokalnu samoupravu;
- Stručni resorni odbori
- Savjet za razvoj političkog subjekta

- Odbor za međunarodne odnose
- Ekonomski savjet
- Odbor za kulturu
- Odbor za nauku i obrazovanje
- Odbor za sport
- Odbor za poljoprivredu
- Odbor za zdravstvo
- Odbor za pitanje poštovanja principa multikulturalizma
- Savjet za ljudska prava
- Odbor za sigurnosna pitanja
- Odbor za zaštitu životne sredine
- Krizni štab
- Ostali odbori i savjeti

NAŠA Inicijativa donosi odluke preko Glavnog odbora o pružanju svog doprinosa u naučno - istraživačkoj djelatnosti.

Nosioci funkcija organa, podružnica, kao i funkcioneri i članovi političkog subjekta koji su uredno zaposleni, u skladu sa zakonima RKS, pružat će poseban doprinos u humanitarnoj djelatnosti političkog subjekta.

Glavni odbor će odlučiti o propisima i visini izdvojenih doprinosa za humanitarne djelatnosti, a Disciplinska komisija će odlučivati o disciplinskim mjerama za nepoštivanje ovih propisa.

Nadležnost ovih tijela i njihove mandate utvrđuje Glavni odbor svojim odlukama.

## **V DIO**

### **Materijalno i Finansijsko Poslovanje**

#### **Član 59**

NAŠA Inicijativa se finansira i obavlja finansisko poslovanje u skladu sa Ustavom i zakonima RKS.

Finansijski direktor je u obavezi da Glavnom odboru podnosi izvještaj svakih šest (6) mjeseci o finansijskom poslovanju političkog subjekta.

NAŠA Inicijativa podnosi Kancelariji Centralne izborne Komisije (CIK) svake godine za period od 1. januara do 31. decembra svoj godišnji finansijski izvještaj u skladu sa propisima i Pravilom o registraciji i radu političkih partija.

Skupština političkog subjekta, kao najviši organ ima najveću odgovornost za finansijska pitanja.

Isto tako Skupštini se podnose svi periodični i godišnji finansijski izvještaji.

Između dvije Skupštine, izvještaje o finansijskom poslovanju političkog subjekta odobrava i usvaja Glavni odbor.

NAŠA Inicijativa je samostalni politički subjekt koji ima svoj tekući račun i vodi jedinstveno računovodstvo.

## **Član 60**

NAŠA Inicijativa je neprofitabilno pravno lice.

NAŠA Inicijativa ne prikuplja nijednu vrstu doprinosa (uplate) osim:

- a) Uplate od pojedinaca ne više od dvije hiljade (2.000) evra unutar jedne kalendarske godine.
- b) Pravna lica ne više od deset hiljade (10.000) evra unutar jedne kalendarske godine.
- c) Članarina ili doprinosi od članova partije, koje kao izvor prihoda političkog subjekta, utvrđuje Glavni odbor svojom odlukom.
- d) Finansiranja i druge potrebe iz budžeta Kosova.

NAŠA Inicijativa neće da obavlja finansijsku profitabilno djelatnost, izuzev prodaje dobara kao što su: publikacije, izdanja, reklamni materijali, poster i sa amblemom ili akronimom političkog subjekta i ostalih izvora dozvoljenih zakonom.

Svi prihodi i rashodi od finansijskih aktivnosti političkog subjekta registrovat će se u finansijskim registrima.

## **Član 61**

NAŠA Inicijativa će održavati saradnju i dozvoliti kontrolu svih finansijskih izvještaja od strane nadležnih a sve u skladu za zakonskim osnovama.

NAŠA Inicijativa je dužna da organizuje i razvije mehanizme za unutrašnju finansijsku reviziju, u cilju borbe protiv korupcije i uspostavljanju jačanja finansijskog upravljanja i transparentnosti.

# **VI DIO**

## **Pristup Dokumentaciji**

## **Član 62**

NAŠA Inicijativa će poštivati pravila koja su utvrđena Zakonom o uvidu u službena dokumenta.

## **Član 63**

Opšti akti političkog subjekta su Statut, pravilnici i poslovnici koje donose organi čiji se rad tim poslovníkom reguliše.

## **Član 64**

### **Članstvo u međunarodnim organizacijama**

Glavni odbor ima nadležnost da odlučuje o učešću političkog subjekta u međunarodnim političkim organizacijama i savezima.



## **VII DIO**

### **Prestanak Rada i Raspuštanje**

#### **Član 65**

O prestanku rada političkog subjekta odlučuje Glavni odbor, većinom glasova.

U slučaju gubljenja pravnog subjektiviteta, Glavni odbor donosi odluku o raspodjeli imovine političkog subjekta.

#### **Član 66**

##### **Promjena, izmjena i dopuna Statuta i Programa**

O donošenju novog Statuta ili izmjenama i dopuna istog odlučuje Glavni odbor.

Statutarna komisija priprema prednacrt ili izmjene i dopune Statuta i Programa koji upućuje svim organima, koja traje najmanje petnaest (15) dana.

Nakon sprovedene rasprave u organima, na osnovu pristiglih primjedbi, Statutarna komisija sačinjava nacrt Statuta i Programa koji dostavlja Glavnom odboru na razmatranje.

Nakon razmatranja Glavni odbor, utvrđuje prijedloge Statuta i Programa i upućuje ih na usvajanje Skupštini.

Skupština usvaja Statut i Program javnim glasanjem većine prisutnih delegata.

#### **Član 67**

##### **Spajanje sa drugom partijom**

Na prijedlog većine članova Glavnog odbora, Skupština može donijeti odluku o spajanju sa drugom partijom.

## **Član 68**

### **Izborne koalicije**

NAŠA Inicijativa može ulaziti u izborne koalicije na svim nivoima ukoliko je to u interesu političkog subjekta i njenih članova.

Odluke o ulasku i izlasku iz koalicija donosi Glavni odbor većinom glasova.

## **VIII DIO**

### **Prelazne i Završne Odredbe**

## **Član 69**

Ovaj Statut stupa na snagu od trenutka usvajanja od strane Skupštine političkog subjekta

Svi akti i dokumenti političkog subjekta moraju biti u skladu sa ovim Statutom.

Predsjednik inicijativnog odbora